

清

史

稿

清史稿

劉清

傅鼐

列傳一百四十八

嚴如煜

子正基

劉清字天一貴州廣順人由拔貢議叙授四川冕甯縣丞擢南充知縣政聲爲一省之冠嘉慶元年教匪起清得民心募鄉勇五百人擊賊人樂爲用賊自爲民時知其名遇輒避之繼從總督英善勦達州匪徐天德數捷率鄉勇羅思舉赴賊營諂降羅其清未得要領而徐天德與王三槐冷天祿合陷東鄉二年春始復之遂署東鄉進克清谿場禽賊黨王學禮天德之勇也言天德與王三槐皆有歸順意總督宜縣令清往招三槐徧歷諸賊壘迎送奉酒食甚謹宣示招撫皆聽命夜宿其帳中三槐隨至大營約期率所部出降然質藉覩虛實非眞意屆期三槐詭稱於雙廟投降伏匪爲掩襲計官軍預設備擊敗之時羅其清冉文偉併聚方山坪清偕總兵百祥奪多福山賊壘會諸路兵攻方山坪克之賊竄通江巴州徐天德王三槐合清所部鄉勇增至千餘人桂浦李子青等皆

驍勇善戰偕諸軍擊賊盜有殲獲羅冉二匪漸蹙三年署廣元縣事總督勒保
攻王三槐於安樂坪未下復令清往招撫三槐恃前此出入大營無忌留隨人
劉星渠等爲質三槐遂詣軍門勒保奏報大捷俘三槐至京廷訊時言官逼民
反仁宗詰之曰四川一省官皆不善耶對曰惟有劉青天一人劉青天者川民
以呼清也帝深嘉之特諭曰朕聞劉清官聲甚好每革衆禦敵賊以其廉吏往
往退避引去如果始終奮勇民情愛戴者勒保據實保奏尋以清治績戰功奏
上晉秩同知直隸州賜花翎於是劉青天之名聞天下四年補忠州加知府銜
參贊額勒登保破冉天元張子聰於竹峪關令清於通江巴州招撫餘匪自王
三槐被誘諸賊首皆疑憚不敢出然感清無他不忍加害每至賊營必留宿盡
禮其脅從者先後投出二萬餘人遣散歸農以功加道銜命隨副都御史廣興
駐達州治軍餉擢建昌道五年冉天元等合諸路賊渡嘉陵江總督魁倫退守
鹽亭鳳凰山令清集民團守潼河上下三百餘里多淺灘盡撤防兵清爭之不
可賊果於太和鎮上游王家觜偷渡委罪於清奪職命以知縣用留營効力既

而德楞泰破賊天元伏誅諸路竄賊旁皇通巴之間勦保以清去歲招降成效
責籌安撫時川匪父子兄弟一家中不盡習教爲賊而奔竄往來過鄉里輒歸
視清屯要隘且勦且撫遣人存問賊首家屬有歸誠之意者潛令圖之屢轉相
引賊遂瓦解藍號鮮大川巴州人號爲狡悍其族人文炳路保及黨楊似山清
皆厚恤其家感恩願效死乃使文炳勸大川降不可且與似山謀殺文炳似山
乘間殺大川與文炳路保同降巴州匪遂滅六年以功復原官仍授建昌道七
年春破賊於南江五方坪禽賊首李彬及辛文等加按察使銜尋授四川按察
使敗藍號齊國典餘匪於兩河口追禽其黨葛成勝諸匪以次平大功告成下
部議叙清在軍七年先後招降三萬餘人有業者歸鄉里無業及有業願從者
爲鄉勇後立戰功者三十餘人其中苟崇勤苟文耀李彬辛文李世玉趙文相
皆賊魁也崇勤即苟文通已奏報殲斃而改名及軍事竣當遣清以諸人田廬
焚蕩驟散將復爲賊臨行重犒之自向富室巨商貸金人感其誠多響應事畢
積逋負至十萬八年陝西餘匪自南山竄出棧道清馳扼廣元遣卒招撫被戕

詔斥輕信縱賊以前功免罪命理糧餉及搜捕餘匪裁撤鄉勇十年事竣入覲
賜御製詩有曰循吏清名遐邇傳蜀民何幸見青天誠心到處能和衆本性從
來不受錢時以異數榮之丁繼母憂去官服闋授山西按察使遷布政使忤巡
撫初彭齡劾其袒護屬吏降四級以從四品京堂用清亦自陳不勝藩司之任
詔斥冒昧降補刑部員外郎熱河新設理刑司員以清往邊方草創多持大體
斷獄平允蒙民亦以青天呼之十七年授山東鹽運使十八年河南教匪起山
東賊黨朱成良等應之陷定陶曹縣巡撫同興恆懼清自請將兵承平久兵習
晏安清攝草屨先之以五百人敗賊於鴟山復定陶又敗之於韓家廟殲賊二
千進攻扈家集縱火焚柵賊突出皆死誅賊首朱成良王奇山自滑縣奔至者
並殲焉兩閱月而事平賊初起時煽惑甚衆清先解散其脅從成良勢孤不得
逞故得速定上嘉其以文職身先士卒特詔褒獎加布政使銜尋授雲南布政
使仍留舊任清性坦率厭苟禮不合於上官又不耐簿書錢穀遂乞病上亦知
之改授山東登州鎮總兵調西州鎮道光二年以老休致命在籍食全俸八年

卒賜祭葬祀山東名宦官其孫熾昌爲兵部主事鑒舉人

傅鼐字重庵順天宛平人原籍浙江山陰由吏員入貲爲府經歷發雲南擢甯
洱知縣乾隆末福康安征苗疆調赴湖南軍營司餉運晉秩同知直隸州賜花
翎嘉慶元年授鳳凰廳同知治當苗衝會大軍移征湖北數匪降苗要求苗地
歸苗當事議允之鼐知愈撫且愈驕乃招流亡團丁壯於要害築碉堡防苗出
沒苗以死力來攻且戰且修閏三年而碉堡成有哨臺以守望礮臺以禦敵邊
牆相接百餘里每營哨臺舉銃角婦女性畜立歸堡環數十里皆戒嚴四年禽
苗曾吳陳受加知府銜巡撫姜晟疏薦鼐能勝艱鉅方治鎮筭一帶荒田均給
丁壯請俟事竣送部時鎮筭左右營黑苗最爲邊患五年蹶金塘苗出掠瀘溪
岱總兵富志那夜分三路擣其巢伏兵隘路苟賛屢要擊痛殲之斃首逆吳尚
保苗始奪氣詔嘉獎命在任食知府俸六年貴州苗復亂湖南環苗地東南北
三面七百餘里其西二百餘里接貴州未設備石峴苗煽十四寨糾湖南苗叛
鼐率鄉勇千五百馳赴銅仁貴州巡撫伊桑阿以招撫戡定上聞各寨寔尙沸

然槍械未繳總督琅玕至急檄鼐會勦崖屯溝黔兵攻其前鼐夜由山徑入連破五巢上下湖山峽尤險夜分兵圍攻至次日克之火其寨三日中盡破諸寨殲苗二千有奇倣湖南法建碉堡守之伊桑阿因冒功誤邊伏法錄鼐功加道銜總理邊務並命以苗疆道員用七年丁父憂詔鼐辦理邊防善後民苗悅服難易生手命留任初鼐建議遷永綏城於花園副將營於茶洞而貴州方藉永綏爲聲援尼其事至是詔琅玕察奏乃赴銅仁面陳永綏孤懸苗中形如釜底有二難三可慮并請移湖南守備於貴州邊境螺蛳堡以爲犄角乃決議移之既而羣苗率衆來爭鼐率鄉勇深入苗大集環之數重以奇計突圍出尋議勒繳槍械苗酋石宗四等抗命並阻丈田十年與其黨石貴銀糾衆數千來犯敗之旁都河追至孟陽岡殲賊甚衆生擒石宗四石貴銀是役因賊戕良苗故得用苗兵深入戰月餘破寨十六餘皆乞降永綏苗遂平廳屬高都兩頭羊二寨皆震懾無敢抗事聞予優叙擢辰沅永靖道鼐治苗專用鴻勦法大小百戰所用僅鄉勇數千苗人於穹山峭壁竚越如平地無部伍行列伏弩中從暗擊明

銃銳且長隨山起伏多命中鼐因苗地用苗技訓練士卒裹沙輕走習藤牌閃
躍狹路則用短兵每戰後輒嚴汰數年始得精卒千號飛隊風雨不亂行列遺
資道路無反顧甘苦與共是以能致死先是議興屯田上書巡撫高杞曰防邊
之道兵民相輔湖南苗疆環以鳳凰永綏乾州古丈坪保靖五廳犬牙相錯營
汎相距各數里元年班師後苗擾如故鼐竭心籌之制勝無如碉堡募丁壯數
千與苗從事來則痛擊去則修邊前戈矛後邪許得險即守寸步而前然後苗
銳挫望絕湖南自乙卯二載用兵耗帑七百餘萬國家經費有常頑苗叛服無
定募勇不得不散則碉堡不得不虛後患不得不慮則自圓不得不亟通力合
作且耕且戰所以招亡拯患也均田屯丁自養自衛所以一勞永逸也相其距
苗遠近碉堡疏密爲屯田多少鳳凰廳碉堡八百需丁四千輪守並留千人備
戰需田三萬餘畝乾州廳碉堡九十餘守丁八百屯田三千餘畝保靖縣碉堡
四十餘守丁三百屯田千五百餘畝古丈坪廳苗疆止設碉堡十餘守丁百屯
田五百餘畝永綏廳新建碉堡百餘留勇丁二千亦屯田萬畝而後邊無餘隙

墾苗以成圈圍之勢峻國防省國計也異族逼處非碉堡無以固碉堡非勇丁無以守勇丁非屯田無以贍邊民漸近鋒鏑固頤割世業而保身家後路同資屏蔽亦樂捐有餘以補不足所募土丁非其子弟即其親族距邊稍遠者仍佃本戶輸租視古來屯戍以客卒雜處勢燕越矣與其一旦散數千驍健無業子弟流爲盜賊何如收駕輕就熟之用而不費大帑一錢惟執事圖之於是收叛產分給無業窮苗佃種自擒石宗四餘匪願返侵地永綏得萬餘畝乾州鳳鳳二廳次之乃續犁沿邊隙地二萬畝曰官墾田贖苗質民田萬餘畝曰官贖田以廩屯官授屯長給老幼籌補助備犒賞暨歲修城堡神祠學校育嬰養濟諸費復以兵威勒交苗占民田三萬五千餘畝苗自獻田七千餘畝其經費田則佃租變價屯丁田則拊碉躬耕訓練講武設屯田守備掌之轄於兵備道屯政舉使兵農爲一以相衛民苗爲二以相安與官及兵民約曰毋擅入苗寨毋稍役苗夫與苗約曰毋巫鬼椎牛羣飲以糜財毋挾槍矛尋毬毗釀鮮請乾鳳永保四廳編立邊字號廣鄉試中額一名苗生編立田字號加中額一名苗叢威

奮十三年屯務竣入覲詔曰傅鼐任苗疆十餘年鋤莠安良興利除弊建碉堡
千有餘所屯田十二萬餘畝收歸難民十餘萬戶練兵八千人收繳苗寨兵器
四萬餘件又多方化導設書院六義學百近日苗民向學革面革心朕久聞其
任勞任怨不顧身家今召見果安詳諳練明白誠實洵爲傑出之才堪爲嚴疆
保障其加按察使銜以風有位十四年擢湖南按察使苗人籲留命每年秋一
赴苗疆撫慰邊人猶在苗疆設木匱於門訴者投牒其中夜出閥之黎明起視
事剖決立盡兵民白事直至桶前及爲按察使一如同知時下無壅情事無不
舉十五年兼署布政使十六年卒於官仁宗深悼惜詔謂倚畀方隆正欲簡任
疆寄加恩贈巡撫銜照贈官賜鈔賜祭一壇苗疆建專祠祀湖南名宦光緒中
追諡壯肅初鼐排衆議以事攻勦爲大吏所惎將中以開邊設匪監司阿意旁
掣其肘鎮筭總兵富志那獨保全之富志那從征金川習知山礮設險之利鼐
寢從受之卒以成功鼐歿後二妾寡居飭粥不給其廉操尤著云

嚴如煜字炳文湖南漵浦人年十三補諸生舉優貢研究輿圖兵法星卜之書

尤留心兵事乾隆六十年貴州苗亂湖南巡撫姜晟辟佐幕上平苗議十二事言宜急復乾州進永綏與保靖松桃鎮草聲勢可通攻乾州道瀘溪必先得大
小章大小章者故土司遺民名曰狡猪驍健與苗世仇如煜募能狡猪語者往
開示利害挾其酋六人出推誠與同臥起乃送質率其屬陽投乾州爲內應約
一舉破賊因黔師牽掣未果次年卒賴其衆救兩鎮兵於河溪後復平隴戰花
園皆爲軍鋒大小章於大府檄或不受必得如煜手書始行云嘉慶五年舉孝
廉方正廷試平定川楚陝三省方略策如煜對幾萬言略謂軍興數載師老財
匱以數萬罷憲之衆與猾賊追逐數千里長林深谷中投誠之賊無地安置則
已降復亂流離之民生活無資則良亦從亂鄉勇戍卒多游手募充廩一旦兵
撤餉停則反思延亂如此則亂何由弭臣愚以爲莫若倣古屯田之法三省自
遭蹂躪叛亡各產不下億萬畝舉流民降賊之無歸鄉勇戍卒之無業者悉編
入屯團練捍衛計可養勝兵數十萬餉省而兵增化盜爲民計無逾此仁宗親
擢第一次日召詣軍機處詢屯政復條上十二事召見以知縣發陝西下其疏

於三省大吏令採行六年補洵陽縣在萬山中與湖北邊界相錯兵賊往來如織時方厲行堅壁清野如煜於築堡練團措置尤力賊至無可掠去則抄其尾又擇堅寨當衝者儲糧供給官軍徐天德樊人傑敗於張家坪因馬鞍寨阻其前故不得竄楊遇春破張天倫亦賴太平寨夾擊之力以功加知州銜賜花翎八年擊湖北逸匪於蜀河口斬王祥擒方孝德督秋同知直隸州新設定遠廳即以如煜補授九年建新城復於西南百餘里黎塘漁渡壩築二石城爲犄角治團如洵陽賊至輒殲先後禽陳心元馮世周丁母憂大吏議留任辭不可服闕十三年補潯陽副尋擢漢中知府兵燹後民困兵驕散勇逸匪心猶未革如煜聯營伍立保甲治堡寨問民疾苦興勸農事行區田法教紡織使務本計修復褒城山河堰及城固五門楊填二堰各灌田數萬畝他小堰百餘皆廢勘濬治水利普興復漢中書院親臨講授於華州渭南開諭憚回縛獻亡命數十人於甯羌解散湖北流民於城固擒教首陳恒義皆治渠魁寬脅從令行禁止人心帖服南山遂大定道光元年擢陝安道會廷議川楚陝邊防建設事宜下三

省察勘以如煜任其事周歷相度析官移治增營改汎建城口白河甄坏太平
佛坪五廳移駐文武奏上報可如煜嘗言山內州縣距省遠多推諉牽掣宜仿
古梁州自爲一道及明鄆陽巡撫之制專設大員鎮撫割三省州縣以附益之
庶勢專權一可百世無患以更張重大未竟其議三年宣宗以如煜在陝年久
熟於南山情形任事以來地方安靖特詔嘉獎加按察使銜以示旌異巡撫盧
坤尤重之採其議增廳治於盤厓洋縣界增營汎於商州及略陽檄勘全秦水
利於澧涇澇渭諸川鄭白龍首諸渠規畫俱備社倉義學亦以次推行五年掘
貴州按察使未到官六年入覈仍調陝西抵任數日而卒贈布政使陝民請比
朱邑桐鄉故事留葬南山勿得乃請祀名宦湖南亦祀鄉賢如煜自爲縣令至
臬司皆出特擢在陝中十餘年不調得成其鎮撫南山之功宣宗每論疆吏才
必首及之將大用已不及待爲人性豪邁去邊幅泊榮利視之如田夫野老於
輿地險要如衆米畫沙所規畫常在數十年外措施略見所著書嘗佐邢彥成
籌海寇有洋防備覽佐姜晟籌苗疆有苗防備覽佐傅鼐籌屯田有屯防書又

有三省邊防備覽漢江南北三省山內各圖漢中府志及樂闔詩文集子正基原名芝字山舫副貢生少隨父練習吏事道光中官河南知縣有聲擢鄭州知州治賈魯河息水患河決開封正基佐守護治河兵獄雪其冤得河兵死力城賴以完母憂歸服闋補奉天復州興屯練捕盜有法民殺盜者勿論奉天治吏素弛府尹下所屬以正基爲法盜風爲輯引疾去江南大吏疏調擢授常州知府二十九年大水勘災勤至郡人感之輸錢二十餘萬助賑全活甚衆累署淮陽道按察使咸豐初侍郎曾國藩呂寶基交章薦之命赴廣西治軍需授右江道擢河南布政使留廣西時粵匪披猖將帥齟齬師久無功正基曲爲調和疏論其事謂師克在和事期共濟統兵大帥與地方大吏宜定紛更不齊之勢聯疏闊難合之情布德信以服人心明功罪以揚士氣勿因賊盛而生推諉勿因兵單而務自救勿以小忿而不爲應援勿以偶挫而坐觀成敗庶逆氣可殄大功可成時以爲謙言二年桂林圍解賜花翎尋隨大軍赴湖北時武昌初復命馳往撫卹難民署湖北布政使調廣東復赴廣西清覈軍需內召授通政副使

遷通政使七年引疾歸卒

論曰亂之所由起與亂之所由平亦在民之能治否耳教匪起於官逼民叛其間獨一得民心之劉清卒賴以招撫助誅勦之成功征苗頻煩大兵而未杜亂源傅鼐乃以一廳一道之力勦撫兼施嚴疆綏定南山善後嚴如燁始終其事化榛莽爲桑麻此其功皆在一時節鉞之上光於史策矣

清史稿

列傳一百四十九

方 積

朱爾漢

楊 講

廖 寅

陳昌齊

朱爾贊額

查崇華

方積字有堂安徽定遠人拔貢生以州判發四川補閬中知縣署梁山達州東鄉賊起梁山當其衝賊犯縣境竇白兔山守兵潰積以一百人據小山爲疑兵賊不敢進築砦二百餘所令人自爲守他縣流民依集者三十餘萬人賊至無所掠食屢出奇兵擊走之堅壁清野之法蓋自梁山始既而萬縣靈寶寺賊起越境勦平之又助大兵殲伍文相於石獅山郤林亮功於望牛坡亮功弟廷相賜花翎擢甯遠知府仍駐梁山凡四年至嘉慶六年諸路賊漸平調夔州繼劉清爲建昌道涼山生番叛率師討平之未幾裏塘正土司索諾木根登殺副寺奪其印副將德甯兵爲所困積單騎往密授舊頭目希拉工布方略以其

衆破之歷川北道鹽茶道擢按察使馬邊峨眉嶺諸夷結梁山生番盜邊稽借
提督豐紳由馬邊三河口鑿山深入克六拔夷巢遂出赤夷間道進攻嶺夷十
二地決旬之間每戰皆捷曲曲鳥助逆死拒潛師出其後殄之遷布政使積官
四川二十餘年馳驅殆徧山川風土瞭然於胸用兵輒獨當一面及任藩司僚
屬多故交一無瞻徇清節自勵尤爲時稱卒於官祀名宦

朱爾漢字麗江順天大興人少爲戶部吏乾隆中官甘肅靖遠典史母憂去官
服闋待次時平涼回酋田五作亂爾漢與通判吳廷芳知縣黃家駒守靖遠城
賊來攻靖遠回豪哈得成等期夜半爲內應爾漢得其情令守者悉登城不得
下至哈得成家陽科其穀餉軍因拘之分遣人誘禽城下賊賊之雜守者在城
上已數十人縣役鐵克保最爲劇賊猝禽之角聲起扼城上賊無脫者外賊覺
遂引去由是以知兵聞擢隆德知縣徒底店砦降回擢涇州直隸州知州擒教
匪劉松井擢鞏昌知府嘉慶元年教匪起蔓延三省二年四川賊尤熾總統宜
縣駐達州檄爾漢參軍事是時王三槐踞方山坪白岩山者地險固賊渠林亮

功獎人傑屯山上與方山坪爲聲援將軍舒亮提督穆克登布屯山前之韓彭
坳爾漢兵三百鄉勇三千屯山後之排亞口排亞口之下曰金鳳觀曰草店曰
鴨坪一日盡攻克之復進有木柵當隘不見賊惟以犬守兵蹤攀柵賊自屋旁
斫傷之鳴鑼擊旗左右賊大至爾漢慮斷後路退師先是與韓彭坳諸師爲期
中道而止賊得專力山後故不克既而奉節賊千餘來援敗之禽賊渠邱廣福
岩賊久困欲走傾巢來犯戰一晝夜不得路仍退爾漢攻之三閱月搏戰被創
乃回鞏昌三年連麥十萬石饑軍行至成縣賊渠高胡德來奪敗之於格樓城
禽其黨李德勝四年張漢潮犯秦州爾漢赴成縣會勦鞏昌警至馳還賊已據
城東駕驚河夜掠賊卡而入城守始固以功擢鞏秦階道生番鐵布者居西傾
山中衆十餘萬乘教匪猖獗時出盜內地爾漢以鐵布未叛亂且地險一構兵
非數年不能平鐵布奉回教乃召其阿渾諭之於是來首者踵至一日書姓名
一紙曰此鐵布黨也又出一圖曰盜巢及要隘盡於此分道百餘人捕之悉就
擒鐵布遂定六年川楚陝賊漸燬餘賊多竄甘肅率兵扼勦凡數十戰皆捷八

年甘肅匪平上功最賜花翎爾漢有識斷能得人死力奴客悉以兵法部之自出仕即在行間後遂與教匪相終始用兵有法所用鄉勇侯達海侍衛李榮華武舉劉養鵬千總鄒坤桂攀桂皆操刺勇健善戰故所至有功尋調廣東肇羅道擢廣西按察使署布政使十二年卒於官

楊謹字邁功江西金谿人乾隆四十九年進士授刑部主事總辦秋審執法平內監訟其弟妻謹按律杖贖守夫墓和珅方總刑部意有所徇駁詰之謹面爭和珅叱曰司員敢爾謹厲聲曰司員主稿知爲刑獄得其平耳何叱爲和珅不能奪及珅敗擢員外郎仁宗召見嘉其有守命解餉四十萬兩赴四川濟軍川陝大吏交章論薦授陝西延榆綏道時三省清釐叛產撫卹難民事方殷詔責疆吏慎選公正大員如謹及劉清者任其事謹周歷田野綜覈不苟民漸復業業興抽丁何殊議乃寢調甘肅平慶涇固鹽法道九年擢安徽按察使捕六安州匪劉成巨盜諸法十三年遷江甯布政使淮揚大水乘船盤厓訪問疾

苦渡湖幾覆災黎感之尋以失察山陽知縣王仲漢冒賑坐褫職詔護查賑認真平日實心辦事留河工効力復起用歷淮海道浙江按察使江蘇布政使二十二年擢浙江巡撫未幾坐臨海民毆差釀大獄降四品京堂復不俟代去任降禮部郎中引疾歸道光五年重宴鹿鳴加四品卿銜卒年八十五

廖寅字亮工四川鄰水人乾隆四十四年舉人家貧不能常試禮部十二年中僅再至都以大挑知縣官河南署葉縣時教匪方熾葉當衝寅撫民不擾民有從逆者捕其魁乃定長子思芳有武略省父至葉任以守衛事詔捕教首劉之協久不獲一日思芳巡歷近郊見二人繫馬坐樹下語異之歸戒門者伺狀俄二人入城飲肆中有識之者其一即之協寅趣思芳往與雜坐出不意縛之鞠得實械至都伏法特擢江蘇鎮江知府潯丹陽九曲河築牘以時啟閉民便之法安遠復亂單騎往諭解散黨與耆民等縛其魁以獻事遂平歷署布政使按察使嘉慶十六年遷兩淮鹽運使卹竈丁治私梟鹽課漸增河北滑縣教匪起

清史稿
總督百齡檄寅往徐州協守禦會捕逆匪劉第五誤繫同姓名者坐失察降調上念其禽劉之協功許捐復原職以老病歸遂卒思芳少時居鄉治團練從軍數有功官至江蘇候補道在葉手禽劉之協名聞天下後以捕劉第五獲罪下獄尋赦之

陳昌齊字寶臣廣東海康人乾隆三十六年進士選庶吉士授編修累遷中允大學士和珅欲羅致之昌齊以非掌院無晉謁禮不往大考左遷編修尋授御史遷給事中昌齊生海邦習洋盜情狀上疏論勦捕事略曰洋匪上岸率不過一二百人陸居會匪助兇行劫沿海居民皆採捕爲生習拳勇諳水勢匪以利誘往往從匪可以爲盜即可用以捕盜宜令地方官明示有能出洋勦捕或遇匪上岸殲擒送官驗寔者船物一概充賞被誘從匪者能擒盜連船投首免罪則兵力所未及丁壯亦必圖賞力捕仍令地方各官稽戶口編保甲以清其源於各埠訪拏濟匪糧物各市鎮嚴緝代匪銷贓俾絕水陸勾通之路庶幾洋面肅清地方甯謐嘉慶九年出爲浙江溫處道時海寇蔡牽肆擾昌齊修戰艦簡

軍伍募人出海繪圖閩浙海洋全圖織悉備具每牒報賊情及道里遠近稍有虛妄必指斥之與提督李長庚深相結納俾無掣肘勦海盜必詳盡得其情德楞泰奉命按閩浙議申海禁謂不數月盜可盡斃昌齊曰環海居民耕而食者十之五餘皆捕魚爲業若禁其下海數萬漁戶無以爲生激變之咎誰任之德楞泰改容稱善在任五年以鞠獄遲延部議鐫級江南福建大吏辟調皆不往歸里主雷陽粵秀講席修通志考據詳駁著書終老焉

朱爾贊額原名友桂字白泉漢軍正紅旗人裔出明代王父孝純工詩古文有異才由四川知縣歷官至兩淮鹽運使朱爾贊額納貲爲兵部主事充軍機章京累遷郎中山爲江安糧道兩江總督蘇凌阿閏人爲和珅舊奴恣睢用事廉得其狀白而逐之從總督赴安徽察治劉之協逆黨株連數百人多所省釋署安徽布政使引疾歸以母老乞改京秩授戶部郎中和珅奴劉全之婿號檳榔蔣者倚勢奪民產訟於部刑責不稍貸西賈利旗產嗾言官疏陳使得與漢民通售買下部譏啖以重賄却之持不可大學士朱珪管部聞而重之故事自告

改京官不外用珪荐其才守可大受復出爲廣東潮州知府海盜方張朱濟尤
黠悍乃親歷海瑞治鄉團調鎮兵千守沿海斷內奸接濟濟糧絕屢敗走臺灣
潮盜膽落因其窮蹙解散之盜魁黃茂高許雲湘王騰魁楊勝廣黃德東關兆
奎受撫選其強幹者編入練勇會匪李崇玉踞惠潮山谷中時游奕海上使降
人招之自首朱濟部衆亦有來投者會以母憂去未竟其事服闋補雲南曲靖
嘉慶十四年百齡爲兩廣總督疏請調朱爾贊額廣東擢高廉道署督糧道勦
匪事一以倚之勘海口礮臺舊在山上發礮輒從梶頂過悉改建於山麓屢碎
盜艦挫其鋒暫改運鹽由陸撤紅單船入內港以杜接濟戒並海郡縣嚴斷水
米如在潮州時匪勢漸蹙用舊降人招郭學顯就撫未幾鄭一妻與張保仔率
衆逾萬泊虎門要總督知至海口而議文武噤莫敢決朱爾贊額獨進曰保仔
自知罪大衆多無根拂其請將死闘請撤兵衛單舟巡詣諭以恩威必可集事
艦數百夾水如衝舉砲迎聲震城中請總督過舟叱之曰保仔當泥首乞命如

仍驕肆遲疑無死所矣迨晡保登舟請留三千人招西路賊烏石二不聽則擒之以自贍許之給米千石慰遺保仔乃使餘衆登岸受撫自起碇出洋羣謂其所散皆罷弱自留精銳得米將不可制笑應之曰此不必以口舌爭至期保仔果誘烏石二至高州誅之海盜悉平以功獲優叙賜花翎尋調署南韶道十六年河決李家樓特命百齡爲兩江總督治河事調朱爾贊額爲江南鹽巡道至則佐百齡定計接築洪澤湖口東清堵逼溜刷深太平河使水有所歸次年李家樓決口合龍新築格隄遏水與大隄平初當事主守格隄奉嚴旨失守者從軍法至是見事危急請改守大隄聽河溜穿格隄而下免旁洩之險又新築減堵受水攻展側上游築斜堵挑水數日堵根掛淤乃穩固所籌措工事悉合機宜葦蕩營久爲弊斂樵兵空額無人營員領帑臨時雇募弁目專其利又爲灘棍所持蕩料歸灘棍者十五六歸弁目者十二三歸公用者十二二歲僅得葦十數萬束百齡檄朱爾贊額督治其事乃請以蕩地不產柴者給樵兵人四十畝給牛具籽種建棚廠以居蕩始有兵濬溝渠便筏出入採運始及遠建衙署

俾營員常年駐蕩民挾制偷竊者有禁蕩始有官受事之年探足正額二百四十萬束於是灘棍之利盡失廳員得料抵價少所沾潤皆不便之適有船兵中勘定十七年新葦每束捲口以二尺八寸爲率增舊三寸估右營得葦八百萬束會署江甯布政使未及估左營時河督陳鳳翔爲百齡所劾自訴於朝命尙書松筠侍郎初彭齡按訊牽及葦蕩事廳員熒說嗾驗尾幫舟載餘葦九百束據其重率以衡已收三百萬束之數斥爲不足遂被劾虛糜錢糧苦累樵兵遣戍伊犁時論冤之朱爾廢額因百齡前劾鳳翔詞不盡實獄無結正願以身任遂不辯在戍六年放還久之卒

查崇華字九峯安徽涇縣人少孤游福建備書久之福州將軍魁倫辟佐幕甚見信任魁倫劾總督伍拉納巡撫浦霖即命署總督治其獄閩地瘠苦歷任大吏責供張無藝所屬羅織大戶勒賄民不堪命至是貪酷之吏悉伏辜崇華名聞於時納貲爲通判留福建嘉慶十四年海盜蔡牽平以功賜花翎朱灝欲歸

誠未決崇華隻身至海舶諭以禍福遂受降十七年署臺灣淡水同知高媽達妖言惑衆捕獲訊得劉林祝現謀以次年閏八月望在京師舉事四方起應之崇華牒請奏聞大吏以其語不經置之僅以傳教罪誅高媽達至十八年九月十五日果有林清祝現之變劉林者即林清別名也自高媽達伏法福建匪黨已解散得無事尋以道員謁選授河南南汝光道教匪鉅魁劉松久在逃懸緝十餘載偵知潛匿安徽宿州傳教捕獲之母憂去官道光二年補陝西鳳邠道值大軍征張格爾調駐嘉峪關治軍需自川楚軍興將吏習於糜費崇華一主覈實以內地馬駝出關不耐寒苦關外有臺站應付長驅徒糜芻秣悉罷之節帑甚鉅凡三署按察使治獄明慎以老乞歸卒

論曰勦平教匪不獨賴將帥戮力一時守土之吏與有勞焉最顯者爲四川劉爾漢之保羣昌楊綬之清叛產撫難民廖寅之禽劉之協皆卓有建樹陳昌齊朱爾庚額於治海寇並具謀略而朱爾庚額功尤顯矣查崇華預發林清逆謀

爲疆臣所格及筦西征軍需以撙節稱故同著於篇

清史稿

列傳一百五十

曹振鏞

文孚

英和

王鼎

穆彰阿

潘世恩

曹振鏞字佩笙安徽歙縣人尙書文埴子乾隆四十六年進士選庶吉士授編修大考三等高宗以振鏞大臣子才可用特擢侍講累遷侍讀學士嘉慶三年大考二等遷少詹事父憂歸服闋授通政使歷內閣學士工部吏部侍郎十一年擢工部尙書高宗實錄成加太子少保調戶部兼翰林院掌院學士十八年調吏部尙書協辦大學士尋拜體仁閣大學士管理工部管太子太保二十五年仁宗崩樞臣撰遺詔稱高宗誕生於避暑山莊編修劉鳳誥知其誤告振鏞振鏞召對陳之宣宗怒謫龍樞臣尋命振鏞爲軍機大臣宣宗治尙恭儉振鏞小心謹慎一守文法最被倚任道光元年晉太子太傅武英殿大學士三年萬壽節幸萬壽山玉瀾堂賜宴十五老臣振鏞年齒居末特命與宴繪像四年充

上書房總師傅六年入直南書房七年回疆平晉太子太師八年張格爾就禽
晉太傅賜紫韁圖形紫光閣列功臣中振鏞具疏固辭詔凡軍機大臣別給一
圖以遂讓功之心而彰輔弼之效御製贊曰親政之始先進正人密勿之地心
腹之臣問學淵博獻替精醇克勤克慎首掌絲綸親書以賜之十一年以萬壽
慶典賜雙眼花翎十五年卒年八十有一自縉遺疏均摺至十餘事上震悼詔
曰大學士曹振鏞人品端方自授軍機大臣以來靖恭正直歷久不渝凡所陳
奏務得大體前大學士劉統勳朱珪於乾隆嘉慶中蒙皇祖皇考鑒其品節賜
謚文正曹振鏞質心任事外貌讷然而獻替不避嫌怨朕深倚賴而人不知揆
諸謚法足以當正字而無媿其予謚文正入祀賢良祠擢次子恩漢四品卿振
鏞歷事三朝凡爲學政者三典鄉會試者各四衡文惟遵法令不取淹博才華
之士殿廷御試必預校閱嚴於疵累忌諱遂成風氣凡纂修會典兩朝實錄河
工方略明鑑皇朝文類全唐文皆爲總裁駕謁諸陵及秋獮木蘭每命留京辦
事臨雍視學命充直講恩眷之隆時無與比數請停罷不急工程摺節糜費世

以鹽筴起家及改行淮北票法舊商受損振鏞曰焉有餓死之宰相家卒贊成世特以稱之

文孚字秋潭博爾濟吉特氏滿洲鑲黃旗人由監生考授內閣中書充軍機章京嘉慶四年從那彥成赴陝西治軍需八年隨扈秋獮校射中四矢賜花翎十一年以在直勤擢四五品京堂授內閣侍讀學士歷鴻臚寺卿通政司副使命履勘綏遠城渾津黑河蠻地改徵及大青山牧廠餘地招墾事十三年予副都統銜充西甯辦事大臣疏言青海蒙番重利輕命自來命盜諸案一經罰服怨仇消釋若必按律獄辦不第犯事之家仇隙相尋被害者心反觖望相習成風不可化誨溯蒙番內附以來雍正十一年大學士鄂爾泰等議纂番例頒行聲明俟五年後始依內地律例辦理乾隆年間疊經展限茲復奉命詳議臣以爲番民糾結滋擾或情同叛逆或關繫邊陲大局自應從嚴懲辦若其自相殘殺及盜竊之案向以罰服完結相安已久必繩以內地法律轉恐愚昧野番羣疑滋懼非綏服邊氓之道疏入下軍機大臣議行十六年召回京授鑲白旗滿洲

副都統偕內閣學士阮元勘議山西鹽務疏請停止吉蘭泰鹽官運改併潞商
引額以潞引之有餘補吉課之不足吉鹽許民摶販限制水運至皇甫川而止
下部議行尋授內閣學士遷刑部侍郎十八年緣事降調予二等侍衛命赴山
東治軍需復授內閣學士歷山海關副都統馬蘭鎮總兵錦州副都統二十年
召授刑部侍郎二十四年命在軍機大臣上學習行走偕侍郎帥承瀛赴山東
鞠獄並勘蘭儀決口督濬引河次年春竣工予議叙調戶部又調工部擢左都
御史宣宗即位以樞臣撰擬遺詔不慎先後罷直文字獨留道光二年命往陝
西按鞫渭南縣民柳文璧毆斃人命獄論知縣徐潤受人屬託疏脫正兇事後
得贓枷號兩月遣戍伊犁升任西安知府鄧廷楨偏執枉縱訊無貪酷革職免
發遣巡撫朱勳失察議革職降四五品京堂四年仁宗實錄成加太子太保南
河阻連詔責減黃蓄清至十一月洪湖水多啟壩而高堰山盱石工潰決命文
孚偕尚書汪廷珍馳往按治奏劾河督張文浩於禦黃壩應閉不閉五壩應開
不開湖水過多致石工掣場萬餘丈請遣戍伊犁兩江總督孫玉庭徇隱回護

交部嚴議議於禦黃壩外添建三壩鉗束黃流壩內外及束清運口各壩兩岸
築隸道多作土壩挑濬長河幫培隸身以利漕行速挑引河引清入運堵閉東
清壩杜黃入湖又議覆侍郎朱士彥條陳五事由河臣勘辦疏上並依議行命
文孚等回京責嚴烺魏元焜辦理而引黃濟運仍不得要領河漕交困八年回
疆底定首逆就禽晉太子太傅賜紫韞繪像紫光閣御製贊有和而不同公正
以清之褒十一年以吏部尙書協辦大學士十四年拜東閣大學士管理吏部
十五年轉文淵閣大學士以疾請解職優詔慰諭許罷直軍機十六年致仕二
十一年卒贈太保諡文敬

英和字煦齋索綽絡氏滿洲正白旗人尙書德保子少有雋才和珅欲妻以女
德保不可乾隆五十八年成進士選庶吉士授編修累遷侍讀嘉慶三年大考
二等擢侍讀學士洎仁宗親政知其拒婚事嘉焉遂擯用累遷內閣學士五年
授禮部侍郎兼副都統六年充內務府大臣調戶部以不到旗署爲儀親王所
糾罷副都統七年直南書房扈蹕木蘭射鹿以獻賜黃馬街授翰林院掌院學

士九年帝幸翰林院賜一品服加太子少保命在軍機大臣上學習行走時詔稽巡幸五臺典禮英和疏言教匪甫平民未蘇息請俟數年後再議上嘉納之尋自請獨對論大學士劉權之徇情欲保薦軍機章京袁煦上不悅兩斥之遂罷直書房軍機降太僕寺卿歷內閣學士理藩院工部侍郎數奉使出按事河東鹽課歸入地丁而蒙古鹽侵越內地命偕內閣學士初彭齡往會巡撫察議疏言非禁水運不能限制蒙鹽非設官商不能杜絕私販請阿拉善鹽祇由陸路行銷河東鹽仍改商運吉蘭泰鹽池所產亦招商運辦事詳鹽法志兼左翼總兵復爲內務府大臣十二年偕侍郎蔣子蒲查南河料物加價議准增添仍示限制從之復直南書房十三年命暫在軍機大臣上行走調戶部武英殿進高宗聖訓廟號有誤坐降調內閣學士尋遷禮部侍郎十八年隨扈熱河會林清逆黨爲變命先回京署步軍統領禽林清於黃村西宋家莊實授步軍統領工部尙書滑縣平復太子少保十九年將開捐例廷議不一偕大學士曹振鏞等覆議獨上疏曰理財之道不外開源節流大捐爲權宜之計本朝屢經舉行

但觀前事即知此次未必大效竊以開捐不如節用開捐暫時取給節用歲有所餘請嗣後謁陵或三年五年一舉行民力可紓木闌秋獮爲我朝家法然蒙古迥非昔比亦請間歲一行於外藩生計所全實大各處工程奉旨停止每歲可省數十萬至百餘萬不等天下無名之費甚多苟於國體無傷不得任其糜費即如裁撤武職名糧未必能禁武官不役兵丁而驟增養廉百餘萬應請敕下部臣詳查正項經費外歷年增出各款可裁則裁可減則減積久行之國計日裕至開源之計不得以事涉言利概行斥駁新疆歲支兵餉百數十萬爲內地之累其地金銀礦久經封閉開之而礦苗旺盛足數兵餉各省礦廠亦應詳查興辦又戶部入官地畝請嚴催升科於國用亦有裨益疏入詔以名糧已飭嚴辦開礦流弊滋多仍依衆議豫工事例遂開是歲調吏部復命暫在軍機大臣上行走二十五年宣宗即位命爲軍機大臣調戶部宣宗方銳意求治英和竭誠獻替面陳各省府州縣養廉不敷辦公莫不取給陋規請查明分別存革示以限制上採其言下疆吏詳議而中外臣工多言其不可詔停其議遂罷直

軍機專任部務道光二年以戶部尙書協辦大學士兼翰林院掌院學士四年
仁宗實錄成加太子太保五年洪澤湖決阻運道河漕交敝詔籌海運疆臣率
拘牽成例以爲不可英和奏陳海運折漕二事爲救時之計越日復上疏略謂
河漕不能兼顧惟有暫停河運以治河雇募海船以利運而任事諸臣未敢議
行者一則慮商船到津難以交卸一則慮海運旣行漕運員弁旗丁水手難以
安插因陳防弊處置之策甚悉詔下各省妥議仍多諉爲未便惟江蘇巡撫陶
澍力行之撥蘇松常鎮太五屬漕米以河船分次海運六年八月悉數抵天津
上大悅詔嘉英和創議予議叙特賜紫鞚以旌異之張格爾犯回疆英和疏陳
進兵方略籌備軍需並舉長齡武隆阿可任事多被採用七年奏商人請於易
州開採銀礦詔斥其冒昧調理藩院罷南書房內務府大臣未幾坐家人增租
擾累出爲熱河都統八年命勘南河工程回疆平復太子少保授甯夏將軍以
病請解職允之初營萬年吉地於寶華峪命英和監修嘗從容言漢文帝薄葬
事上稱善議於舊制有所裁省工竣孝穆皇后奉安優予獎叙至是地宮浸水

譴責在事諸臣詔以英和始終其事責尤重奪職籍其家逮訊得開工時見有石母滴水僅以土攔設龍鬚溝出水英和未允狀讞擬大辟會太后爲上言不欲以家事誅大臣乃解發黑龍江充當苦差子孫並褫職十一年釋回復予子孫官二十年卒贈三品卿銜英和通達政體遇事有爲而數以罪黜屢掌文衡愛才好士自其父及兩子一孫皆以詞林起家爲八旗士族之冠子奎照嘉慶十九年進士歷官至禮部尙書軍機大臣緣事奪職復起爲左都御史奎耀嘉慶十六年進士官至通政使後爲南河同知奎照子錫祉道光十五年進士歷翰林院侍講學士後官長蘆鹽運使

王鼎字定九陝西蒲城人少貧力學尙氣節赴禮部試至京大學士王杰與同族欲致之不就杰曰觀子品概他日名位必繼吾後嘉慶元年成進士選庶吉士丁母憂服除授編修兩以大考升摺累遷內閣學士十九年授工部侍郎仁宗諭曰朕向不知汝亦無人保薦因閱大考考差文字知汝學問屢次召見奏對知汝品行汝是朕特達之知調吏部兼署戶部刑部二十三年兼管順天府

尹事復諭曰朕初意授汝督撫今管順天府尹猶外任也且留汝在京以備差
往各省查辦事件自是數奉使出按事鞫獄二十四年調刑部又調戶部道光
二年河南儀工奏銷不實解巡撫姚祖同任命鼎偕侍郎王麟往按暫署巡撫
疏陳儀工用款至辦奏銷與部例成規不符乃以歷辦物料土方價值合之豫
省成規互相增減於楮料引河等款增銷一百三十萬夫工麻斤各款減銷一
百三十萬雖有通融銀數仍歸質用惟八子錢一款以銀易錢多於舊價每兩
提八十文充入經費而於各員應繳之銀一併扣算質違定制疏入命覈實報
銷而薄謚祖同是年擢左都御史父憂歸五年服闋以一品銜署戶部侍郎授
軍機大臣浙江德清徐倪氏因姦謀斃徐蔡氏獄三年不決按察使王維詢因
自盡巡撫程含章與按察使祁墳鞫之甫得情而犯婦在監自縊宣宗特命鼎
典鄉試就治其獄廉得徐故富家以獄破其產官吏多受賄勾結朦庇致獄情
譖幻悉發其覆實之法浙人稱頌焉六年授戶部尙書八年回疆平以贊畫功
加太子太保給像紫光閣蘆熙積疲商累日重命鼎偕侍郎敬徵察辦議以鹽

務首重年清年款先將節年帶徵釐剔見年正款不難按數清完道光二年以前未完銀九百餘萬爲舊欠三年以後未完銀爲新欠緩舊徵新請以堰工加價二文半解部充公半抵完商欠新欠抵完續抵舊欠蘆商生息帑本內直隸水利趙北口兩項非經費歲需請停利三年限滿加一倍利本息同徵舊有拔繳水利帑本一百十七萬兩請停徵三年自道光十一年起歲徵十萬兩五萬完舊本五萬完新本以恤商力近年商力疲乏不能預買生鹽存坨新鹽多滯耗請每包加鹽十三斤俾資貼補從此款目既清庶經久可行又請免繳嘉慶十七年加價交官半文未完銀一百八十四萬餘兩疏入並允行十年蘆商呈請調劑復命鼎及侍郎寶興往按鼎以前次清查傳集各商詳詢定議皆稱可免虧累積壓雖因銀價漸昂尚不致遽形虧折遂議駁時淮鹽尤敝兩江總督陶澍疏陳積弊情形命鼎偕寶興會同籌議中外論鹽事者多主就場徵稅疏言詳覈淮綱全局若改課歸場隨尙多窒碍惟有就舊章大加釐剔使射利者無可借端欠課者無可藉口似較有往轍可循擬定章程十五條曰裁浮費減

窩價刪繁文慎出納裁商總覈滯銷緩積欠恤釐丁給船價究淹銷疏運道添
岸店散輸規飭紀綱收籠鹽又請裁撤兩淮鹽政改歸總督辦理以一事權並
詔允行陶澍得銳意興革淮綱自此漸振鼎之力也十一年署直隸總督十二
年管理刑部事務十五年協辦大學士仍管刑部直上書房十八年拜東閣大
學士二十年加太子太保二十一年夏河決祥符命偕侍郎慧成往治之尋署
河督議者以水勢方張不宜遽塞請遷省城以避其衝鼎持不可疏言河灌歸
德陳州及安徽毫穎合淮東注洪澤湖湖底日受淤萬一宣洩不及高堰危淮
揚成巨浸民其魚矣無論舍舊址築新墻數千里工費不貲且自古無任黃水
橫流之理請飭戶部速具帑期以冬春之交集事不效願執其咎具陳民情安
土重遷省墳可守狀初至汴城四面皆水旦夕且圮躬率吏卒巡護獲無恙泊
工興親駐工次倦則寢肩輿中次年二月工竣用帑六百萬有奇前此馬營工
用一千二百餘萬儀封工用四百七十五萬原議以儀工爲率及歲事加增百
餘萬然事艱於前微鼎用節工速不能如是叙功晉太子太師積勞成疾命緩

程回京自禁烟事起英吉利兵犯沿海鼎力主戰至和議將成林則徐以罪謫鼎憤甚還朝爭之力宣宗慰勞之命休沐養疴越數日自草遺疏劾大學士穆彰阿誤國閉戶自縊冀以尸諫軍機章京陳孚恩穆彰阿黨也滅其疏別具以聞上疑其卒暴命取原橐不得於是優詔憫惜贈太保諡文恪祀賢良祠後陝西巡撫請祀鄉賢特詔允之鼎清操絕俗生平不受請託亦不請託於人卒之日家無餘資子沆道光二十年進士翰林院編修

穆彰阿字鶴舫郭佳氏滿洲鑲藍旗人父廣泰嘉慶中官內閣學士遷右翼總兵坐自請兼兵部侍郎銜奪職穆彰阿嘉慶十年進士選庶吉士授檢討大考擢少詹事累遷禮部侍郎二十年署刑部侍郎因一日進立決本二十餘件詔斥因循積壓堂司各員並下嚴議降光祿寺卿歷兵部刑部工部戶部侍郎道光初充內務府大臣擢左都御史理藩院尚書以漕船滯運兩次命署漕運總督召授工部尚書偕大學士蔣攸銛查勘南河泊試行海運命赴天津監收漕糧予優叙七年命在軍機大臣上學習行走逾年張格爾就禽加太子少保授

軍機大臣罷內務府大臣直南書房尋兼翰林院掌院學士歷兵部戶部尙書十四年協辦大學士承修龍泉峪萬年吉地工竣督太子太保賜紫綬十六年充上書房總師傅拜武英殿大學士管理工部十八年晉文華殿大學士時禁烟議起宣宗意銳甚特命林則徐爲欽差大臣赴廣東查辦英吉利領事義律初不聽約束繼因停止貿易始繳烟叢焚之責永不販運入境強令具結不從兵數遂開則徐防禦嚴不得逞於廣東改犯閩浙沿海驟然英艦抵天津投書總督琦善言由則徐敗數穆彰阿窺帝意移乃贊和議罷則徐以琦善代之琦善一徇敵意不設備所要求者亦不盡得請兵數復起先後命奕山奕經督師廣東浙江皆挫敗英兵且由海入江林則徐及閩浙總督鄧廷楨臺灣總兵達洪阿臺灣道姚瑩以戰守爲敵所忌並被嚴譴命伊里布耆英牛鑑議欵二十二年和議成價幣通商各國相繼立約國威既損更喪國權外患自此始穆彰阿當國主和議爲海內所叢詬上旣厭兵從其策終道光朝恩眷不衰自嘉慶以來典鄉試三典會試五凡覆試殿試朝考教習庶吉士散館考差大考翰詹

無歲不與衡文之役國史玉牒實錄諸館皆爲總裁門生故吏徧於中外知名
之士多被援引一時號曰穆黨文宗自在潛邸深惡之旣即位十閱月特詔數
其罪曰穆彰阿身任大學士受累朝知遇之恩保位貪榮妨賢病國小忠小信
陰柔以售其姦僞學僞才揣摩以逢主意從前夷務之興傾排異已深堪痛恨
如達洪阿姚瑩之盡忠盡力有礙於己必欲陷之耆英之無恥喪良同惡相濟
盡力全之固寵竊權不可枚舉我皇考大公至正惟以誠心待人穆彰阿得肆
行無忌若使聖明早燭其奸必資重典斷不姑容穆彰阿恃恩益縱始終不悛
自朕親政之初遇事模棱緘口不言迨數月後漸施其伎倆英船至天津猶欲
引耆英爲腹心以遂其謀欲使天下羣黎復遭荼毒其心陰險實不可問潘世
恩等保林則徐屢言其柔弱病軀不堪錄用及命林則徐赴粵西勦匪又言未
知能去否僞言熒惑使朕不知外事罪實在此若不立申國法何以肅綱紀而
正人心又何以不負皇考付託之重第念三朝舊臣一旦實之重法朕心實有
不忍從寬革職永不叙用其罔上行私天下共見朕不爲已甚姑不深問朕熟

思審處計之久矣不得已之苦衷諸臣其共諒之詔下天下稱快咸豐三年捐軍餉予五品頂戴六年卒子薩廉光緒五年進士由翰林官至禮部侍郎潘世恩字芝軒江蘇吳縣人乾隆五十八年一甲一名進士授修撰嘉慶二年大考一等擢侍讀和珅以其青年上第有才望欲招致之世恩謝不與通以次當遷和珅抑題本六閱月不上仁宗親政乃擢侍講學士一歲三遷至內閣學士歷禮部兵部戶部吏部侍郎督雲南浙江江西學政十七年擢工部尙書調戶部母憂歸服除以父老乞養會其子登鄉舉具疏謝坐未親詣京降侍郎帝鑒其孝思仍允終養居家十載道光七年父喪服闋補吏部侍郎遷左都御史再授工部尙書調吏部十三年超拜體仁閣大學士管理戶部尋命爲軍機大臣兼翰林院掌院學士晉東閣大學士調管工部充上書房總師傅加太子太保十八年晉武英殿大學士二十八年以八十壽晉太傅賜紫纓其明年引疾迭疏乞休溫詔慰留僅解機務三十年文宗即位復三疏始得予告食全俸留其子京邸咸豐二年鄉舉重逢詔就近與順天鹿鳴宴次年復與恩榮宴四年

卒遣親王奠醕入祀賢良祠謚文恭世恩歷事四朝迭掌文衡備叨恩遇筦部務安靜持大體黑龍江將軍請增都爾特六屯議地當游牧開墾非計不可許言官奏山東鹽課請歸地丁議山東場籠半毗連淮境一歸地丁聽民自運自銷必爲兩淮引課之累不可行在樞廷凡十七年益慎密有所論列終不告人海疆事起林則徐所論奏廷議多贊之及穆彰阿主撫世恩心以爲非不能顯與立異迨咸豐初詔舉人才世恩已在告疏言林則徐歷任封疆有體有用請徵召來京備用並薦前任臺灣道姚瑩文宗避之於罪穆彰阿時猶舉其言次子曾瑩道光二十一年進士由編修官至吏部侍郎孫祖蔭自有傳

論曰守成之世治尚綜覈而振敵舉衰非拘守繩墨者所克任也况運會平陂相乘非常之變往往當承平既久萌蘖蠢兆於其間馭之無術措置張皇而庸佞之輩轉以彌縫迎合售其欺其召亂可倖免哉宣宗初政一倚曹振鏞兢兢文法及穆彰阿柄用和戰游移遂成外患一代安危斯其關鍵已矣和才不竟用王鼎忠貞致身文字潘世恩皆恪恭保位者耳

清史稿

列傳一百五十一

阮元

汪廷珍

湯金釗

阮元字伯元江蘇儀徵人祖玉堂官湖南參將從征苗活降苗數千人有陰德元乾隆五十四年進士選庶吉士散館第一授編修逾年大考高宗親擢第一超擢少詹事召對上喜曰不意朕八旬外復得一人直南書房懋勤殿遷詹事五十八年督山東學政任滿調浙江歷兵部禮部戶部侍郎嘉慶四年署浙江巡撫尋實授海寇擾浙歷數年安南夷艇最強鳳尾水澳等黃諸幫附之沿海土匪勾結爲患元徵集羣議爲弭盜之策造船礮練陸師杜接濟五年春令黃巖鎮總兵岳聖擊箸黃幫滅之夏寇大至元赴台州督勦請以定海鎮總兵李長庚總統三鎮水師並調粵閩兵會勦六月夷艇糾鳳尾水澳等賊共百餘艘屯松門山下遣諜間水澳賊先退會颶風大作盜艇覆溺無算餘衆登山檄陸師搜捕禽八百餘人安南四總兵溺斃者三黃巖知縣孫鳳鳴獲其一曰倫利

貴礮之九月總兵岳璽胡振聲會擊水澳幫禽殲殆盡土匪亦次第殲撫浙洋漸清而餘盜爲蔡牽所併閩師不能制勢益熾復時犯浙李長庚已擢提督元集資與造霆船成配巨礮數破牽於海上八年奏建昭忠祠以歷年捕海盜傷亡將士從祀盜首黃葵集舟數十號新興幫令總兵岳璽張成等追勦逾年乃平之偕總督王德奏請以李長庚總督兩省水師數逐蔡牽幾獲而王德遇事仍掣肘十年元丁父憂去職長庚益無助復與總督阿林保不協久無成功遂戰歿十一年詔起元署福建巡撫以病辭十二年服闋署戶部侍郎赴河南按事授兵部侍郎復命爲浙江巡撫暫署河南巡撫十三年乃至浙詔責其防海殄寇秋蔡牽朱儻合犯定海親駐甯波督三鎮擊走之牽復遁閩洋時用長庚部將王得祿邱良功爲兩省提督協力勦賊元議海戰分兵隔賊船之策專攻蔡牽十四年秋合擊於漁山外洋竟殄牽詳得祿等傳元兩治浙多惠政平寇功尤著云方督師甯波時奏請學政劉鳳誥辦鄉試監臨有聯號弊爲言官論劾遣使鞫實詔斥徇庇褫職予編修在文穎館行走累遷內閣學士命赴山

西河南按事遷工部侍郎出爲漕運總督十九年調江西巡撫以捕治逆匪胡秉耀加太子少保賜花翎二十一年調河南擢湖廣總督修武昌江隄建江陵范家隄沔陽龍王廟石壩二十二年調兩廣總督先一年英吉利貢使入京未成禮而回遂漸跋扈元增建大黃濱大虎山兩礮臺分兵駐守迭疏陳預防夷患略曰英吉利恃強桀驁性復貪利宜鎮以威不可盡以德綏彼之船堅礮利技長於水短於陸定例外國貨船不許擅入內洋儻違例禁即宜隨機應變量加懲創各國知彼犯我禁非我輕啟釁也詔勗以德威相濟勿孟浪勿葸懦道光元年兼署粵海關監督洋船夾帶鴉片煙勅褫行商頂帶二年英吉利護貨兵船泊伶仃外洋與民鬪互有傷斃嚴飭交犯英人揚言罷市歸國即停其貿易久之拆閱多託言兵船已歸俟復來如命乃暫許貿易與約船來不交犯乃停止終元任兵船不至元在粵九年兼署巡撫凡六次六年調雲貴總督滇鹽久敵歲糴課十餘萬元効罷蠶吏力杜漏私鹽并衰旺不齊調劑抵補逾年課有溢銷酌撥邊用騰越邊外野人時入內地劫掠西保山等處邊夷日攘攘以

墾山射獵爲生可用乃募猲猲三百戶屯種山地以禦野人即以溢課充費歲有擴充野人畏威漸有降附者十二年協辦大學士仍留總督任車里土司刀繩武與叔太康爭鬪脅官求助檄鎮道擊走之另擇承襲乃安越南保樂州土官農文雲內閩嚴邊防勿使竄入亦不越境生事尋文雲走死詔嘉其鎮靜得大體十五年召拜體仁閣大學士管理刑部調兵部十八年以老病請致仕許之給半俸瀕行加太子太保二十六年鄉舉重逢晉太傅與鹿鳴宴二十九年卒年八十有六優詔賜卹謚文達入祀鄉賢祠浙江名宦祠元博學淹通早被知遇敕編石渠寶笈校勘石經再入翰林院編國史儒林文苑傳至爲浙江巡撫始手成之集四庫未收書一百七十二種撰提要進御補中秘之闕嘉慶四年偕大學士朱珪典會試一時樸學高才搜羅殆盡道光十三年由雲南入覲特命典試時稱異數與大學士曹振鏞共事意不合元歉然以前次得人之盛不可復繼歷官所至振興文教在浙江立誌經精舍祀許慎鄭康成選高才肄業在粵立學海堂亦如之並延攬通儒造士有家法人才蔚起撰十三經校勘

記經籍纂詁皇清經解百八十餘種專宗漢學治經者奉爲科律集清代天文
律算諸家作疇人傳以章絕學重修浙江通志廣東通志編輯山左金石志兩
浙金石志積古齋鐘鼎欵識兩浙輶軒錄淮海英靈集刊當代名宿著述數十
家爲文選樓叢書自著曰望經室集他紀事談荔諸編並爲世重身歷乾嘉文
物鼎盛之時主持風會數十年海內學者奉爲山斗焉

汪廷珍字瑟庵江蘇山陽人少孤母程撫之成立家中落歲凶饑粥或不給不
令人知母曰吾非恥貧恥言貧疑有求於人也力學困諸生十年始舉於鄉成
乾隆五十四年一甲二名進士授編修大考擢侍讀未幾遷祭酒六十年以事
忤旨降侍讀嘉慶元年直上書房大考擢侍讀學士母憂歸服闋補原官七年
督安徽學政任滿復督江西學政累遷侍讀學士太僕寺卿內閣學士皆留任
廷珍學有根底初爲祭酒以師道自居選成均課士錄教學者立言以義法力
戒摹擬剽竊之習及官學政爲學約五則以訓士曰辨塗曰端本曰敬業曰裁
僞曰自立與士語諄諄如父兄之於子弟所刻試牘取易修辭之旨曰立誠編

士風爲之一變萬載棚民入籍舊分學額後裁之士客訐訟久不決廷珍請復分額爭端乃息十六年授禮部侍郎復直上書房侍讀宗學十八年典浙江鄉試留學政任滿回京二十二年署翰林院掌院學士擢左都御史充上書房總師傅二十三年遷禮部尙書二十四年仁宗六旬萬壽慶賀期內遇孝慈高皇后祭辰部臣未援故事疏請服色坐率忽降侍郎逾年復授禮部尙書道光二年典會試教習庶吉士車駕謁陵命留京辦事三年宣宗釋奠文廟禮成臨幸辟雍詔曰禮部尙書汪廷珍蒙皇考簡用上書房師傅與朕朝夕講論非法不道使朕通經義辨邪正受益良多朕親政後畀以尙書之任盡心厥職於師道臣道可謂兼備今值臨雍眷懷舊學加太子太保子報原以員外郎即補用示崇儒重道之意四年仁宗實錄成賜子報閏主事孫承佑舉人南河高堰潰決阻連上以廷珍生長淮揚命偕尙書文學往勘劾河督張文浩總督孫玉庭譴黜有差疏籌修濬事宜交河督辦理五年回京協辦大學士七年卒上震悼優詔賜卹贈太子太師入祀賢良祠命大阿哥賜矣賜銀千兩治喪諡文端江蘇

請祀鄉賢特詔允之廷珍風裁嚴峻立朝無所賴附出入內廷寢食見之莫不肅然自省生平力戒刻薄凡貪冒謗諱有不忍爲皆守母教大學士阮元服其多聞淵博勸著書廷珍曰六經之奧昔人先我言之更何以長語相溷讀書所以析義要歸於中有所主而已服用樸儉或以公孫宏擬之笑曰大丈夫不以曲學阿世爲恥而徒畏布被之譏乎後進以文謁言不宗道曰異日恐喪所守屬官有例送御史者持不可曰斯人華而不實何以立朝後皆如所言人服其精鑒

湯金釗字敦甫浙江蕭山人嘉慶四年進士選庶吉士授編修十三年入直上書房金釗端謹自持宣宗在潛邸甚敬禮之母憂服闋擢侍講督湖南學政累遷內閣學士二十一年復直上書房典江南鄉試留學政詔勉以訓士不患無才務培德經學爲本才藻次之金釗闡揚詔旨通誠士子會匪以禍福煽惑鄉愚金釗著福善辨刊發曉諭徐州俗悍武生不馴者繩之以法遷禮部侍郎任滿仍直上書房宣宗即位調吏部益嚮用時用尙書英和議命各省查州縣陋

規明定限制金創疏言陋規皆出於民地方官未敢公然苛索者畏上知之治其罪也今若明定章程即爲例所應得勢必明目張膽求多於例外雖有嚴旨不能禁矣况名目碎雜所在不同檢察難得真確轉滋紛擾無論不當明定章程亦不能安立章程也吏治貴在得人得其人雖取於民而民愛戴之不害其爲清非其人雖不取於民而民嫉讐之何論其爲清有治人無治法惟在督撫舉錯公明而非立法所能限制會中外大臣亦多言其不便金創疏入上手批答曰朝有諍臣使朕胸中黑白分明無傷於政體不勝欣悅予議叙道光元年兼署戶部侍郎兩江總督孫玉庭以南漕浮收不能盡去議請八折徵收學政姚文田御史王家相皆奏言不可金創既同部臣議覆復疏爭曰康熙中奉永不加賦之明詔此大清億萬年培養國脉之至計也前有議加耗米及公費銀者戶部以事近加賦議駁今准其略有浮收不肖者益無顧忌而浮收且多於往日雖告以收逾八折即予嚴參然前此逾額者何嘗不于嚴譴卒不聞爲之減少獨於新定之額恪遵而不敢踰此臣之所不敢信也在督撫奏定之後不

虛控告浮收在州縣縱有發覺又將巧脫其罪是限制仍同虛設徒爲盛朝開
加賦之端臣竊惜之疏入下江浙督撫妥議事乃寢尋以吏部事繁罷直書房
典江南鄉試道經銅山見運河支渠爲黃流淤塞歲苦潦回京奏請疏濬如議
行二年典會試調戶部父憂歸六年服闋署禮工二部及倉場侍郎仍直上書
房授皇長子奕緯讀實授戶部侍郎七年連擢左都御史禮部尙書上方倚畀
迭命赴山西直隸四川湖北福建鞠獄按事四年之中凡奉使五次所至持法
明慎悉當上意充上書房總師傅調吏部尙書十一年皇長子適疾不起忌者
因以激上怒罷總師傅降兵部侍郎踰兩年復自左都御史授工部尙書轉吏
部連典江南順天鄉試十六年陝西巡撫楊名颺被劾命偕侍郎文慶往按暫
署巡撫又往四川按事名颺復與臬司互訐得其冒工底屬狀劾罷會京察以
奉使公明予議叙又赴張家口太原鞫獄十八年以戶部尙書協辦大學士仍
調吏部十九年命按事安徽江蘇浙江自禁烟議起海疆久不靖林則徐既罷
琦善主撫復不得要領金鉗素不附和議與穆彰阿等意齟齬一日召對上從

容問廣東事可付諸何人金釗以林則徐對上不悅至二十一年事且益棘詔予則徐四品卿銜赴浙江軍營亦未果用之未幾有吏部司員陳起詩規避倉差金釗還其呈牘禁勿遞爲所訐坐降四級調用逾年授光祿寺卿以衰老乞罷住京養疴許以二品頂戴致仕久之上仍眷念二十九年皇太后之喪具疏上慰賜頭品頂戴咸豐四年重宴鹿鳴加太子太保六年卒詔以尙書例賜卹證文端金釗自爲翰林布衣脫粟後常不改富官廉潔負一時清望雖被排擠卒以恩禮終子修通政司副使

論曰阮元由詞臣出膺疆寄竟殄海寇開府粵滇綏邊之績並有足稱晚登宰輔與樞臣曹振鏞異趣惟以文學裁成後進世推耆碩汪廷珍湯金釗正色立朝清節並著金釗雖以直言被擯宣宗終鑒其忠誠易名曰端肯無愧焉

清史稿

列傳一百五十二

覺羅寶興

宗室敬徵

宗室禧恩

陳官俊

卓秉恬

覺羅寶興字獻山隸鑲黃旗嘉慶十五年進士選庶吉士授編修累遷少詹事入直上書房十八年仁宗幸熱河林清逆黨突入禁城寶興散直至東華門與賊遇急入告警宣宗方在上書房聞警戒備賊不得逞上還京擢寶興內閣學士十九年授禮部侍郎以事忤旨詔斥寶興不學降大理寺卿罷直書房復坐部刊科場條例誤高宗爲高祖降二級調用尋予三等侍衛充吐魯番領隊大臣道光二年召爲大理寺少卿復因事降通政司參議歷左副都御史兵部侍郎出爲秦寧鎮總兵八年授理藩院侍郎調兵部迭命偕戶部尙書王鼎察治長蘆兩淮鹽務籌議整頓詳王鼎傳十年出爲吉林將軍疏言松花江西岸輝發河北岸舊例封禁其餘閒礦山場均設卡倫惟謂兵丁打捕牲畜以備貢品

民人無照私出挖菱斫木者查拏治罪又言伯都訥珠爾山荒田先後開墾五千二百六十二晌其租息請自道光十五年爲始以其半分賞兵丁半存備報修工程此外尙有可墾荒地五萬六千餘晌作爲官荒將來奏請招佃徵租烏拉涼水泉已犁七萬三千九百餘晌請撥二道河東二萬晌以七成給烏拉總管衙門三成給協領衙門資爲津貼餘未墾地五萬三千餘晌亦作官荒並從之調盛京又調成都十七年署四川總督逾年實授時馬邊越嶺邊外夷匪數出爲患十九年疏言禦邊之策不外勦撫防三者撫之之道在施於平時斷無失利之後轉而就撫之理比來勞師糜餉迄無成功爲今計者以修邊防爲急務陳防邊五事一增兵額請於馬邊增兵千二百雷波普安安阜越嶺甯越各增兵八百峨邊屏山各增兵四百一改營制請以綏定協副將移駐馬邊廳城遊擊都司以下各增設移駐有差一築碉堡飭各廳縣因地制宜多修堡寨責令各集團練官給臺礮督率教演擇要隘築礮臺增設大礮定期巡閱歲春夏之交建昌道赴越嶺峨邊永寧道赴馬邊雷波屏山周歷巡閱各一次秋冬

責成提督與建昌總兵分赴巡行察勘邊隘一優獎邊吏馬邊越巂兩廳同知請三年俸滿以題調選缺知府升補疏下議行言官論奏四川提督應如湖南例半年駐越巂等處寶興議馬邊越巂相距遼遠請於春秋更匪出沒之時提督往駐馬邊峨邊雷波三廳建昌總兵往駐越巂甯越又言越巂邊防以大路爲重麥子營利濟站均應增駐弁兵乾溝諸汛應酌量移撤分設於馬日樁諸處越巂甯越兩營相距頗遠聲勢不能相及前請以建昌左營遊擊移駐大苦薩地遠在甯越之東而越巂營參將復與遊擊不相統屬請越巂甯越適中之界牌樓以建昌鎮右營都司移駐專管麥子營利濟站兩汛並從之先是寶興以馬邊諸廳縣增設防兵籌議邊防經費請按糧津貼計可徵銀百萬兩以三十萬爲初設防兵之需每歲經費即以餘銀七十萬兩生息置田供支上以津貼病民機部帑銀百萬翰林院侍讀學士王炳瀛奏四川前買義田徧及百餘州縣若更以數十萬帑銀於各州縣買田收租賚朕將盡歸公產請限於四廳近邊地收買安置屯防下寶興安議疏言邊防完竣用銀二十二萬兩有奇以

三十七萬發鹽茶各商歲得息三萬七千餘兩足數增設練勇餉械之需餘銀四十萬聽部撥別用遂罷買田議二十一年拜文淵閣大學士留四川總督任時大學士琦善協辦大學士伊里布相繼罷在朝滿洲大臣鮮當上意故有是授二十六年入覲命留京管理刑部充上書房總師傅兼翰林院掌院學士二十八年元旦加恩年老諸臣加太保十月卒年七十二諡文莊

宗室敬徵隸鑲白旗肅親王永錫子嘉慶十年封輔國公授頭等侍衛兼委散秩大臣副都統十九年授內閣學士兼鑾儀使充總族長二十二年失察宗室海康等習紅陽教褫職謫居盛京尋予四等侍衛乾隆門行走道光初累遷工部侍郎授內務府大臣調戶部八年偕尚書王鼎察治長蘆鹽務奏定歸補帑課章程詳王鼎傳十二年南河奸民陳堂等盜決于家灣官隄命偕尚書朱士彥往勘疏陳諸口已合堵下尙未閉氣閘有蟄陷陳堂等聽從逸犯陳端糾眾以爲從問擬疏防各官遣戍通判張懋祖賠修堵工不實罰賠枷號覆勘湖河各工請擇要興修高堰山盱卑矮石工分年改砌碎石信堵補還石工智堵仁

河義河改修石底裏河福興閘場卸急築揚河西岸加高磚工改拋碎石並從之又會同兩江總督陶澍議定淮鹽票引兼行言官所論官票運私侵蝕暢岸爭占馬頭三者皆可無慮詔如原議行十四年授左都御史偕侍郎吳椿勘浙江海塘疏言念里亭至尖山柴工尙資鑿溜石塘仍當修整鎮海及錢家橋汎議改竹築塊石不如條石坦水舊法爲堅實烏龍廟以東冬工暫緩回京擢兵部尙書調工部十五年以孝穆皇后孝慎皇后梓宮奉安龍泉峪諭日不慎罷尙書都統仍充內務府大臣十六年署戶部侍郎累遷工部尙書兼都統東河總督栗毓美多用輒工御史李蘓言其不使命敬徵偕蘓往勘疏陳已辦輒工尙屬整齊輿論謂保灘護厓可資其力水深溜急之處不及埽工鞏固捨辦險工未可深恃請停止燒輒改辦碎石從之十八年調戶部二十二年南河揚河漫口水由灌河入海有議即改新河河督麟慶以河流未定遠難決議命敬徵偕尙書廖鴻荃往勘疏言改河之議在因勢利導今查灌河海口至蕭莊口門三百六十餘里新河正溜由六塘出達灌口其下游東北一百十里滔滔直注

惟當潮長時黃水相逼壅閼不前而上游自口門至響水口二百餘里支流忽分忽合必須兩岸築隄束水方免汎濫計工長三百餘里經費難籌且中河連道爲黃流橫截不得不移塘灌運清水本弱仍恃借黃以濟空船引轉需時重運更形艱滯是移塘乃權宜之計常年行之恐妨運道舊黃河自蕭莊迄舊海口四百二十餘里尾閭寬暢自漫口斷流河身益淤若挽歸故道堵口挑河共費五六百萬較改河築隄撙節實多請定明歲春融興工俟軍船回空後築堵合龍詔如議行尋以戶部尙書協辦大學士二十三年偕侍郎何汝霖赴南河勘工又赴河南察視中河廳漫口疏陳築堵挑河工費需銀五百十八萬兩較祥符工費爲節省允之二十五年奏河南下北河廠廟工乃北岸七廳適中之所河臣宜常年駐此便於控制詔河督每於伏汛前移駐廟工立冬後仍回濟甯尋坐濫保駐藏大臣孟保降內閣學士未幾復授工部尙書又坐濫保科布多參贊大臣果勒明阿褫職三十年署正白旗滿洲副都統咸豐元年卒詔念前勞予一品銜依尙書例賜卹諡文慤子恒恩左副都御史孫盛昱自有傳

宗室禧恩字仲蕃隸正藍旗睿親王濱穎子嘉慶六年賜頭品頂戴授頭等侍衛乾清門行走十年晉御前侍衛兼副都統鑾儀使上駟院卿轉奉宸院卿遷內閣學士十八年擢理藩院侍郎二十年授內務府大臣調戶部侍郎二十五年仁宗崩於熱河避暑山莊事出倉猝禧恩以內廷扈從建議宣宗有定亂勳當繼位樞臣托津戴均元等猶豫禧恩抗論眾不能奪會得秘匱硃諭乃偕諸臣奉宣宗即位命在御前大臣領侍衛大臣上行走道光二年擢理藩院尚書時哈薩克部衆潛聚烏梁海議遷徙安置增設卡倫吏部尚書松筠諳習邊事上每垂詢禧恩因以諳之松筠素坦率遂代刪改疏稿禧恩怒以上聞松筠坐越職干預被譴尋調工部仍兼署理藩院尚書六年調戶部八年加太子少保署吏部尚書九年隨扈盛京詔念睿親王多爾袞數定大勳加恩後裔賜禧恩雙眼花翎十二年湖南江華搖趙金龍作亂命禧恩偕盛京將軍瑚松額督師未至總督盧坤提督羅思舉已平之殲金龍禧恩素貴倨奉命視師意氣甚盛嗾諸將不待而告捷謂金龍死未可信思舉以金龍焚骸及佩物爲證議始息

廣東猺匪趙仔青竄入湖南率提督余步雲總兵曾勝追勦之偕巡撫吳榮光疏陳善後事湖南既定而兩廣總督李鴻賓勦連山猺閱半年軍屢挫詔逮鴻賓以禱恩署總督由湖南進兵遣步雲勝等先後破賊禽首逆鄧三盤文理燉其巢甫一月諸猺乞降詔嘉其奏功迅速賜三眼花翎封不入八分輔國公班師途次丁母憂溫諭慰之十三年孝慎皇后薨命理喪儀坐議禮徵引違制褫御前大臣戶部尙書內務府大臣尋復授理藩院尙書以生日受屬員餉送爲御史趙敦詩所劾疏辯得直敦詩坐謫十四年因相度龍泉峪萬年吉地加太子太保調兵部尙書兼署禮部戶部十八年詔以南苑牲畜不蕃禧恩久管奉宸苑廢弛疏懈罷其兼領尋得員司積弊狀盡罷諸兼職降內閣學士二十二年署盛京將軍授理藩院侍郎留將軍署任英吉利內犯海疆戒嚴命治盛京防務既而和議成疏陳善後十事並巡洋章程如議行二十五年以病解職坐失察內地民人越朝鮮界墾地削公爵降二等輔國將軍三十年起署馬蘭鎮總兵密雲副都統咸豐元年召授戶部侍郎二年擢戶部尙書協辦大學士管

理藩院事尋卒贈太子太保諡文莊禧恩自道光初被恩眷及孝全皇后被遷入宮家故寒素賴其資助遂益用事偏僻禁近要職兼攝諸部凌轢同列人皆側目后晚寵衰禧恩亦數獲譴罷斥文宗即位乃復起不兩年登協揆焉

陳官俊字偉堂山東濰縣人嘉慶十三年進士選庶吉士授編修遷贊善二十二年入直上書房大考二等擢洗馬累遷右庶子典陝西鄉試督山西學政道光元年命各省明定陋規中外臣工多言窒礙官俊亦疏陳不可行詔嘉之予議叙會密諭留心察訪官吏賢否政治得失官俊侍曾直內廷爲宣宗所眷意氣甚張尋遷侍講學士命回京仍直上書房山西巡撫成格追劾官俊在學政任殿差買妾妄作威福大開奔競上以官俊於殿差買妾已自承不諱曾薦舉魏元烺卽名泰人材尚不繆惟所述太監往河東查訪鹽務控案事出無稽解職就質命長齡道出山西傳旨面詰成格亦以不能指實引咎遂兩斥之官俊降編修罷直上書房連典貴州江西鄉試歷中允祭酒侍講學士內閣學士六年授禮部侍郎調吏部十九年擢工部尙書東陵郎中慶玉侵帑籍沒主事

全孚預告多所寄頓事覺語由官俊閒談漏洩回奏復諱飾詔斥失大臣體襯職二十一年起爲通政使歷戶部吏部侍郎管理三庫摺禮部尙書調工部二十四年以吏部尙書協辦大學士官俊再起歷典鄉會試殿廷御試每與衡校充上書房總師傅編修童福承素無行直上書房授皇子讀給事中陳增勑之語及福承爲官俊妻作祭文措詞過當福承讒黜詔斥官俊容隱不奏罷總師傅議降三級調用從寬留任二十九年卒優詔賜卹稱其心田坦白贈太子太保入祀賢良祠諡文忠賜其孫厚鍾厚滋並爲舉人官俊初直上書房授宣宗長子奕綜讀宣宗嘉其訓迪有方後皇長子逾冠而薨上深以爲憫故遇官俊特厚屢獲咎而恩禮始終不衰子介祺道光二十五年進士官編修咸豐中助軍餉加侍講學士銜後在籍治圃練守城賑飢賜二品頂戴介祺績學好古所藏鐘鼎彝器金石爲近代之冠

卓秉恬字靜遠四川華陽人嘉慶七年進士選庶吉士年甫逾冠授檢討典陝西鄉試十八年改御史歷給事中章疏凡數十上論盜風未息由捕役與盜賊

因緣爲姦捕役藉盜賊以漁利盜賊仗捕役爲護符民間控告官不爲理盜賊
結恨又召荼毒直隸之大名滄州河南之衛輝陳州山東之曹州東昌武定江
蘇之徐州最甚請飭實力禁懲巡漕山東履勘泰安兗州各屬探濬新泉四十
三處定名勒石歷鴻臚寺少卿順天府丞二十五年疏言由陝西略陽迄東至
湖北鄖西謂之南山老林由陝西南羌迄南而東經四川境至湖北保康謂之
巴山老林地皆磽瘠糧徭極微無業游民給地主錢數千即租種數溝數嶺歲
薄不收則徙去謂之棚民良莠莫辨攘奪時聞一遇旱澇一二姦民爲之倡即
蟻附蠶起州縣以地方遼闊莫能追捕遂至互相容隱迨釀成大案即加參劾
事已無濟且事連三省大吏往返咨商州縣奉文辦理恒在數月之後與其即
一隅而專謀之何如合三省而共議之請於扼要之地專設大員控制宣宗深
諒之詔下三省會議未果行僅將邊境文武酌就要地改駐添設道光四年調
奉天府丞丁父憂去服闋歷太僕寺大理寺少卿太僕寺卿宗人府丞內閣學
士典江南鄉試十五年遷禮部侍郎調吏部督浙江學政擢左都御史召還京

兼管順天府尹事歷兵部戶部吏部尙書協辦大學士二十四年拜文淵閣大學士晉武英殿歷管兵部戶部工部賜花翎咸豐五年卒年七十四贈太子太保諡文端秉恬兼管京尹最久凡十有八年時九卿會議一二王公樞相主之餘率占位畫諾秉恬在列時有辯論不爲用事者所喜子樞道光二年進士官至吏部侍郎

論曰自設軍機處閣臣不預樞務始猶取名德較者者表望中朝繼則旅進旅退之流且以年資眷暱馴躋鼎鉉矣寶興號嫻吏事而蒙簠簋不飭之聲敬徵數視河工差著勞勸禱恩陳官俊並恃恩私崛而復起卓秉恬以言官進視穢默自安者稍表異焉